

# Cumbatter la disoccupaziun da giuvenils

Martin Cabalzar/FMR

La cussegliera naziunala Sandra Locher Benguerel (PS GR) ha inoltrà a Berna in'interpellaziun concernent la dischoccupaziun da la giuventetgna en connex cun la crisa da corona. Sco quai che la parlamentara grischuna constatescha munta la conclusiun d'in giarsunadi il start en la vita professiunala ed è uschia er la basa per ina vita independenta. Ella avria dentant era perspectives per in'ulteriura perfecziun professiunala e saja la basa per emprender per vita duranta. In schlet start en la vita professiunala restrenschia las schanzas sin il martgà da lavur ed haja consequenzas a lunga vista. Ils responsabels hajan gia oz ina gronda sensibilitad per questa situaziun da passadi. «Tras la digren economica prognostigada en connex cun la crisa da Covid-19 ston ins dentant quintar cun dapli dischoccupaziun tar la giuventetgna e cun effects negativs sin ils giuvenils che vulan cumenzar lur furmaziun professiunala», scriva Sandra Locher. Perquai merita questa fasa da passadi tranter la furmaziun professiunala e l'entrada en la vita professiunala atenziun speziala. Quai cunzunt per pudair dar a la giuventetgna perspectives a lunga vista, damai che la crisa da corona vegnia a tangar ed influenzer l'economia anc in lung temp.

Concretamain vul la cussegliera naziunala grischuna savair dal Cussegl federal quantas giarsunas e quants giarsuns che han terminà lur furmaziun èn actualmain senza lavur u han aspects per in'ulteriura furmaziun professiunala. En quest connex vul l'interpellanta era savair tge mesiras supplementaras ch'il Cussegl federal prenda en vista per impedir la dischoccupaziun da la giuventetgna e schebain la Taskforce furmaziun professiunala 2030 saja er incumbensada d'analisar questa problematica.